


www.BibleForChildren.org



Juan 14



Masa shinanyamanahue. Papan joi nincacoinnahue. Hea rihbi nincacoinnahue. Heen papan jihue janin ta xobo hicha qui. Yamahiya cahen Mato ta hen jhuetijaxoni cahi hen jayamahan. Caxon mato jhuetijaxonax tah hen joribiyaxihqui, mato bichí sca. Hea jano hihquiton man mato rihbi hihnon tah hen mato bichi joyaxihqui.




Hea Juan tah hen maton huetsa hihxon, mato
betan tenenica hihxon, mahbe jihuetai hihxon,
mahbe Cristo tenexonnica hihquish,

Patmos janeya mai tonco
pishca janin tsahotai.




Papan joi yohixon raquexonma Jesusen joi yohiquin
sirijahiton ta nea main hea tsahoncannishqui.
Tsoabi hen nincamayamascanon hihxon


ta hea neno sipo xoboho
tsahoncannishqui.



Jan yohihiya sca cahen heen yoshin hinahihnati.
Hinahihnaxon jisí bi naihoh sca janoxon yonoti jai,
quiquin jati. Hen jisí bi Papa Dios jano tsahoti,
jahuen janoxon yonoti janin.




Naihoh jai jatihibichin jato nincanon, main jai
jatihibichin nincarihbinon, mai chicho jai
jatihibichin nincarihbinon,
quebíjistima hiaman cahibaan
nincarihbinon, jeneho cahibaan
rihbi jatihixonbi nincacanquin.
Nincacax: Jahuen jati janinxon
noque jihuemahi
ta hihti siri qui,
jahuen carnero
ta hihti
siri qui.




Jaabo rabe ta shinan hihbo qui, xaba hihbo, jatihibi
yonoti hihbo. Jascabi sca quiquin hihbo tah qui
hihcani, behuahibo nincacax.




Bochiqui sca hen jisí bi Papan jema naihoh quehax
botopaqueti jahui. Jahuen Jerusalem behna, jaan
raanah botopaqueti jahui. Hihti siri, huanomaha
jahuen benen bihnon haibaan hihti siri rajotibo
sahuehi quescari hahan hihti siritiboya Papan jema
botopaqueti.




Hen nincacah bi Papan janoxon yonoti janinhaxcoshin
yohuani: —Jisnahue. Jonibo tocan ta Papan jati qui.
Jato betanbi ta jihuenoxihquiqui. Jaabo rihbi ta
jahuen jihuetahbo hihnoxihquiqui. Papa Diosen ta
jato jihuequihnnoxihquiqui.



Papan yonotinin hea jismahah cahen janoxon Carnero
betan Papa Diosen jihuemahi janinhax huaca
tejabahai hean jisquin. Jahuen jene cahen nexnani
siri, jaa jene xehahax non jihuescatihi.



Bari rihbi jano pishinyamahi, hoxne rihbi
pishinyamahi. Papan xaba jano xabatai copi bari
xabati pishinyamascai. Carnero ta jahuen xaba qui.



Papan jihuetahmabo ta
jano hihcotimahiqui.
Papan jihuetahmabo,
rishtayahpabo,
quesabo, jascapahbo ta
jahuentianbi
hihcotimahiqui.
Carneronen jahuen
quirica janin jahuen
jihuetahbaan jane
huishá cahen jaabo
rahsi jano hihconicabo.




Jaan jihuemaha ta tsoabi
benayamascatihiqui, tsoabi
mahuayamascai, tsoabi
huaohihyamascai,
huiniyamascai, hisinyamascai.
Jascápahonish bi
jascayamascai —hihqui.



Jahuabi tiromabo ta yamascatihiqui. Jaa jema
janinbi ta Papa Dios betan Carneronen jato
jihuemayaxihquiqui. Jahuen jihuetaahbaan ta
hahbetanbi hihxon hahqui jaton shinan
camayaxihquiqui. Jaton
bemanan qui huishá
ta Carneronen jane
jayaxihquiqui.
Carnero
bejisaibo ta
jayaxihcanihqui
jahuen
jihuetaahbo.



Yamanicabo sca hicha hean jisquin, patoroboya jaton
jonibo hihpahonibo, Papa Dios bebon nichinah
manataibo rahsi. Jato casticannoxon cahen hicha
huishayahpa quiricabo caxquexon huetsa rihbi noquen
Hihbaan caxquehah. Jaa quirica huesti cahen
jihuenicabaana. Jano nichiyamanicabo
tiromabo quen jaabo tiromahi
jihuepahoni huishapaquenhixon
jaa joi jato
nincamapaquexon sca
jato casticanscaquin.
Jihuenicabaan quirica
janin jaton jane yamahi
quen chihi janin
canicahbo rahsi,



Papan jato
jano potahah.



Johue hih ta Dios Yoshin jaiqui. Johue hah ta Criston
bihtibaan jaiqui. Nincaxon Johue hahnahue maton
rihbi. Jiricatsihquish benahue. Queenxon hahan
jihueti jene bihresnahue, hinanresa tah qui
—hah sca noquen Hihbaan hea jaquin.



Nai nequebihabo hihti queenxon ta
jahuen baque hea huesti Papan
raannishqui, hinamehxon
nincacoinaibo jatihibi
queyoyamanox mananon, tsoabi
mehtexehtaxma
jihuenon.



Romanobo 3:23 Jatihibi jonibo hohchamisbo copi
ta jascapa rahsi noque jisiqui, hahbe
jihueti hahtipahyamahibo.

Romanobo 6:23 Jaton ribin jismaquin hahcajaquin ta
hohchataibo Papan jismapaqueyaxihquiqui, jato masa
masamascanoxon. Jato masajaxon bi ta noque
hahxonrestihiqui. Noquen Hihbo Jesucristonen noque
hahxonni quen tah non queyoyama sca janoxihqui
non manatihi.

Hebreobo 9:27 Noque jonibo rihbi ta huesti coti res
mahuanicabo qui. Jaa pecaho cahen hohchayabo
Papan casticanyaxihqui.



Efesiobo 2:8,9 Jahua copi hahxontimahi bi ta queenxon
res mato queyoyosmabo hahxonihqui. Man nincacoinaiton
ta jascajaxonihqui, hea huetsabaan, man siripi janí que
ma bi. Man sirijaquin hahcai copima ta mato
queyoyosmajahiqui, heen huetsabaan. Jaa copi tah man
Hen sirijaquin hahcai copi ta hea queyoyosmajahiqui hih
man tsoabi jatimahi.

Romanobo 10:9,10 Noquen Hihbo Jesus ta Papan
hahquirihbi huenicoinnishqui hihxon, jointinin hihcoinai
shinanxon, miin janan rihbi Jesus ta heen Hihbo qui
hihquish tah min jihue hihbo sca min jatihi, Papan
jihuemahah. Noquen jointinin hinamehxon, noquen janan
rihbi non Papa yohihiya ta jaan noque siri jisiqui, noque
jihuemanoxon.



Juan 3:16,17 Nai nequebihabo hihti queenxon ta jahuen
baque hea huesti Papan raannishqui, hinamehxon
nincacoinaibo jatihibi queyoyamanox mananon, tsoabi
mehtexehtaxma jihuenon. Main jihuetaibo casticani
jonon hihxonma bi hen jato jihuemahi jonon hihxon ta
Papan hea raannishqui.

1 Juan 5:11-13 Papan ta yohicoinihqui, jan noque
queyoyamanox jihuemahi non honannon hihxon. Jahuen
baquen noque jihuemahi non honannon hihxon noque
yohicoinquin. Jahuen baque bichish tah non
queyoyamascanax manatai. Jahuen baque bihyamahax
tah non queyonox manatai. Maton tah man jahuen baque
nincacoinscai. Man queyoyama sca janox manasca man
honannon hihxon tah hen mato yohihi.



Juan 14; 2 Corinto 5; Jayaxihquibo 4, 21, 22

Storyline by: Edward D. Hughes

Illustrated by: Lazarus
and Alastair Paterson

Adapted by: Sarah S.

Capanahua Bible (kaq) © 2008, Wycliffe Bible
Translators, Inc. All rights reserved.

<https://live.bible.is/bible/KAQWBT/MAT/1>

©2026 Bible for Children, Inc.

www.M1914.org

www.bibleforchildren.org

